

CIMELIA

Qu

5387



7-4

*Book of the*




5387

CINELIA

8481







Cim. Gu. 5387.



Ioan. Sarij Zamoscij,  
Belfensis, & Zamechē-  
sis Præfecti, ac in Galliā  
Legati, Oratio:

QVA HENRIC. VALESIVM  
Regem renunciat.



LVTETIÆ PARISIORVM.  
Ex Officina Federici Morelli Typographi Regij.

M. D. LXXIII.

CVM PRIVILEGIO REGIS.



NOMINA LEGATORVM, AB ORDINIBVS  
Regni Poloniæ, & magni Ducatus Lituaniæ.

- Adam. Conarski de Cobilino, Episcopus Posnaniensis.  
Albert. à Lasco, Palatinus Siradiensis,  
Ioan. à Tomice, Castellanus Gnesnensis.  
Andr. Comes à Gorca, Castellanus Medireciensis, Capitaneus Gnesnensis, &  
Valcensis.  
Ioan. Herburt de Fulstin Castellanus Sanocensis, & Capitaneus Premisliensis.  
Nic. Christophorus Radiuil, Dux de Olica, & Niesuis, Curia magni Ducatus  
Lituaniæ Marschalcus.  
Ioan. de Zamoscie, Belsensis, & Zamechensis Capitaneus.  
Nic. Firlei de DambrowiŹa, Palatini Craconiensis F. Capitaneus Casimiriensis.  
Ioan. à Sborov, Capitaneus Odalanouiensis.  
Nic. de Tomice.  
Alexand. Pronski Palatini Kioniensis F.





IOAN. SARI ZAMOSCII,  
BELSENSIS, ET ZAMECHENSIS  
PRAEFECTI, AC IN GALLIAM  
LEGATI, ORATIO:

*Qua HENRIC. VALESIVM  
Regem renunciat.*

**S**I AD alium, quàm ad te, summis non modò generis ac fortunæ, sed etiam animi ingeniique ornamentis præditum, ab ordinibus Polonia, ac Lituaniæ regnum deferremus, HENRICE Princeps Serenissime, pluribus nobis de magnitudine huius muneris, omnique officio regio nunc disse- rendum, Réxque ipse creatus, ad studium laudis, & cogitationes tanto fastigio dignas suscipiendas, excitandus, atque inflammandus esset. Sed cum Deus Opt. Max. comitiis Camonenſibus, creandi causa Regis habitis, ita studia nostrorum hominum direxerit, ut cum publica salute & dignitate consentirent, quemadmodum te creato Rege, asperitates & difficultates Reipub. nostræ, quasuis iam facile depelli, & superari posse confidimus, ita nos hoc labore quoque leuatos esse videmus. Superioribus temporibus necessaria hæc fuit legatis, qui ad Reges



# IO. ZAMOSCII RENVNCIATIO

aduocandos mittebantur, oratio, cùm benemeritorum, de libertate nostra imperioque, Regum filios, patres, maiorésque nostri regnare iuebant. Quod tamen ita feliciter nobis succedebat, vt pietati nostræ erga defunctos Principes, nouorum Principum in Rempub. nostram beneficiis, satisficeret. At nunc quando summus honos hic à nobis non maioribus tuis, sed tibi tributus est, facto adeò eximio, & singulari à nobis de te iudicio, quis locus nobis pluribus verbis, aut admonendi, aut cohortandi, tui relictus est? Quamobrem cùm mihi, & collegis meis hisce Senatoribus amplissimis, & Patriciis nobilissimis, id oneris impositum sit, vt, quemadmodum antè ad Camonum in Polonia, Rex omnibus fauentibus renunciatus es, ita te hîc quoque more institutoque maiorum, in hoc tam augusto loco, tantæque frequentia hominum, Regem renunciemus, abundè me, pro virili, huic muneri satisfecisse arbitrabor, si ante solemnem renunciationem, primùm quibus de causis te ad fastigium regium suffragiis nostris extulerimus: deinde, quale regnum habiturus sis, exposuero: postremò verò, quid homines nostri non tam à te requirant, quàm expectent, breuissimè attingero. Quibus in rebus explicandis, cùm & de te, & de nobis ipsis verba nobis facienda sint, ita orationem meam temperabo, vt nec tuæ grauitatis, quod te præsente hæc dicentur, nec nostri pudoris oblitus, sed de te, pro rei magnitudine modicè, de nobis modestè esse locutus, omnibus meritò videar.

Multa



Multa tibi, HENRICE Princeps, ad regiā potestatem obtinendam, apud nos subsidio esse, ac viam quasi præmunire poterāt, VALESIAE familiae nulli in terris secundæ dignitas, Gallici nominis splendor, magna commoda, magnæque oportunitates, quæ eiusdem sanguinis, Regibus, apud nos & Gallos imperantibus, ac iis auctoribus, & principibus, societate inter nostros, ac Galliarum populos sancta, nobis accederent: tum æquissimæ propositæ dominandi, & iuris nostri tuendi, & amplificandi, leges, adiectioque vectigalium patrimonij tui. Non nihil etiam tibi suffragatam esse, posset aliquis existimare, deligendi Regis ex ea gente securitatem, cum qua non modò vniuersis publicè, nulla bella, nullæ offensiones fuerunt, sed vix cuiquam priuatim, tot sæculorum interuallo, vlla controuersia intercessit. Non leuia quidem hæc sunt, Princeps ferenissime: sed si quis rem intentis, vt aiunt, oculis, accuratius consideret, ea adiumenta causæ tuæ, non firmamentum fuisse reperiet. Nam primùm, si quæ familia digna fuit honore hoc summo, certè ea, quæ cum IAGELLONIBVS aliquo sanguinis vinculo coniunctæ fuerunt, nisi præsens rerum status impedisset, dignissimæ erant. Etenim IAGELLONIBVS tantum nos debuisse libenter profitemur, quantum etiam illorum stirpe extincta, ad affinitates possit redundare, quod eorum consiliis, vigilantia, legibus, multas partes Reipub. ab initiis fundamentisque constitutas, ius, & libertatem nostram firmatam,



# IO. ZAMOSCII RENVNCIATIO

stabilitam, auctam, ac ipsum Imperium, quod à superioribus Regibus acceperant, coniuncta Lituania, recuperata Prussia, defensa Liuania, duplicatum habemus. Nec iniquo animo feres, HENRICE Princeps, nobilitati domus VALESIORVM, nobilitatem AVSTRIORVM domus æquari, qui ob iustæ & moderatæ dominationis laudem, à multis populis expetiti, iam aliquot ætatum interuallo, tot opulentissimis, ac potentissimis regnis, ac ipsa augusta Romani imperij dignitate potiantur. Vt Ioan. Moschorum Principem præteream, qui generis sui claritatem, ex longo, & ab aliquot sæculis nūquam interrupto stemmatum ordine, Græcorumque etiam Imperatorum imaginibus collectam, morum feritate contaminavit. Quod verò ad nominis Gallici gloriam spectat, compertum nobis est, hanc, & nunc summam esse, & in omni memoria summam fuisse, ut annales non modò vestri, sed Græcorum etiam, populi Romani, multarumque gentium, ac in his & nostri testantur. Scimus Gallos priscis temporibus, res maximas bellis gessisse, Romanis rerum quondam dominis, supra trecentos annos terrori fuisse, ac ipsam Romam orbis terrarum imperij sedem cepisse, non modò in Europa, sed in Asia etiam transmissis mari, multos populos deleuisse, regna condidisse. Scimus item Gallorum arma proximis temporibus illustria fuisse, & nunc apud eosdem disciplinam bellicam, artemque militarem vigere: scimus Gallos omni sapientiæ, pietatis, ac humanitatis com-



commendatione, iam inde ab initio floruisse, nunc verò cum Italia, vnica exquisitioris eruditionis ac artificij, & cultioris ac humanioris victus parente, de litterarum, scientiæ, ac omnis elegantiae gloria certare: scimus integritate, iustitia, fide, temperantia, Gallos à nulla gente superari. Omitto alias nationes, quibus tantum vos ipsi tribuitis, quantum homines, qui certam ac firmam fiduciam in virtute sua collocant, alienæ virtuti tribuere debent. De his tantum loquar, à quarum Principibus legationes ad comitia nostra venerant. Vos Germanos fratres vestros in omni virtute vobis similes, ac propè geminos, vnde nomen optimæ ac fortissimæ genti inditum est, prædicatis: nos verò eorum ingenia stabilia & solida, factorum & dictorum constantiam, & castitatem incorruptam, intrepidorumque animorum inuictum robur laudamus. Nec Suecum nomen, ab eadem stirpe cum Germanico profectum, minoris facimus. Præterea verò minimè nos rerum gestarum, ac morum nostrorum, & naturæ commendatione dissuadente, & veritate prohibete pœnitet, aut Regi nostri sanguinis parere pœnituisse, cum non desint nobis in Polonia, Lituania, ac Russia nostra, viri, etsi non regio genere, at regio certè animo, prudentia, fortitudine, innocentia, continentia, omnibusque belli ac pacis artibus excellentes. In PIASTO sanè, quanquam non modò nullis honoribus antè vsa, verumetiam ne patricia quidem ex domo, ad fastigium regium euecto, eiusque poste-



# IO. ZAMOSCI RENVNCIATIO

ris, qui cùm apud nos annos amplius quingentos regnassent, his legibus, ac institutis, quibus ius, libertatem & dignitatem nostram adhuc tuemur, Rempub. nostram formarunt, ac longè & latè patens, & opibus, ac gloria florens regnum, quod deinceps IAGELLONIBVS commiseramus, nobis reliquerunt, apparuit, Polonis, nec in regno gerendo, & administrando scientiam, nec in defendendo, & dilatando animum defuisse. Ex Lituania verò non modò à Polonis IAGELLONEM receptum Regem, sed cùm is in Polonia, magnitudinem animi, moderationemque ingenij sui nobilitasset, filium eius VLADISLAVM, Pannoniorum precibus, ad regnum opulentissimum euocatum, ac eiusdem nepotem VLADISLAVM alterum à Bohemis primum, deinde Pannoniis exceptum, regna hæc LVDOVICO filio per manus tradidisse constat. Nam quid ego SIGISMVND O primo, VLADISLAI fratri, abrogato Christierno imperio, Sueciæ, ac item post LVDOVICVM in prælio cum Turcis cæsum, Pannoniæ & Bohemiæ regna oblata, & ab eo, animo regio repudiata, narrè? Quorū illi populis quibus præfuerunt, æquitatē, probitatem, & ingenia decoris auida probarunt: hic verò apud nos, ea fama, ea existimatione regnavit, vt omnium cōsensu PATER REGVM appellaretur. Possem multa de OLGO, possem de VLODIMIRO, possem de aliis commemorare, quo intelligatur, & Russos nostros regnandi arte non caruisse. sed non id agimus hoc loco.



loco. Ceterū Gallia procul omni dubio, tantū armis, viris, classe, magnitudine vectigalium, multitudine fructuum, varietate earum rerum, quæ exportantur, excellit, vt ex societate cum Gallis, te, fratremque tuo, auctore, & duce, iſta, æquabilique ac iuſta commerciorum ratione deſcripta & conſtituta, plurimū nobis vtilitatis quærat. Sed ex A V S T R I O - R V M regnis, ac etiam ex Suecia propter vicinitatem, & celeriora auxilia habuiſſemus, & faciliorem ac expeditiorem negotiationem, mercatores noſtri, illis in regnis habent, vberiorē verò & fructuoſiorem, ſe habituros deinceps ſperabant. Quid verò nobis acerbi, aut iniuſti, ab vſlo competitorum tuorum, ad quem voluntates, & ſtudia noſtra conuerſiſſemus, timēdum fuit? Primū ſinguli veteres noſtras regnandi leges ſeruare pollicebantur, ac alias quæ plurimum dignitatis & ornamenti nobis afferrent, vltro proponebant. Deinde verò nos, vt quas vellemus, iuberemus, quod poteſtatis noſtræ, nobis à maioribus relictæ fuiſſe cernebant, hortabantur, atque in omnes, quas tam publico, quàm priuato de iure, vel iuſſiſſemus, vel antè perſeſtas haberemus, verbis conceptis iurare non recuſabant. Num igitur in mentem cuiquam venire potuit, vt de fide principum ad ſanctitatem & conſtantiam natorum, religione iureiurandi obſtrictorum, dubitaret? & à miti, & ſedato S V E C I ingenio, graue aliquid & violentum metueret? pro perenni, & multis ætatibus tot nobiliſſimorum regnorum populis conteſtata,



IO. ZAMOSCII RENVNCIATIO

A V S T R I O R V M pietate, grauitate, continentia, beneficentia: periurium, leuitatem, cupiditatem, iniuriam reformidaret, præsertim verò ab eo, qui non modò ea in familia natus sit, sed ita in atate ineunte imbuatur & instituatur, vt præter exempla maiorum & patris sanctissimi, ac cum ceteris virtutibus, ei qui summæ rerum præsit, conuenientibus, tum ipsa benignitate ac clementia insignis, naturæ bonitatem, educatio, ac disciplina corroboret. Nihil item periculi fuit, ne quid noster, cui summum hunc magistratum mandassemus, alienum à legibus institutisque maiorum, abhorrens à libertate propria generis, ac nominis nostri cõmitteret, qui fortuna alternante æquissima. ratione parèdi, ac imperandi vices, priusquam in sublimi collocaretur, communi atque eodem cum omnibus iure vsus, & antequam rectè regnandi sensum, imperij dulcedine degustata corrumperet, quæ hominibus libero animo affectis, dominatio grauis & non toleranda, quæ grata & iucunda foret, ipse expertus esset. Iam verò, quod ad vectigalia, fructusque patrimonij tui attinet, Suecia coniuncta, si rex noster à Meridie, ab Oriente, à Septentrione, littora maris Balthici, ac penè totum sinum Balthicum, ditione complecteretur, quantæ non tantum priuatorum, verum & publicorum commodorum facultates, quanta subsidia & adiuumenta ærario nostro parabatur? Nam quid ego de Moscoiæ accessione dicam? de congesta multis sæculis gaza, de maximis vectigalibus, de latitudine finium,

de va-



de varietate populorū, de numero prouinciārum, de  
multitudine copiarū, de copia mercium? Quæ com-  
muni rege creato, collatis in vnum viribus Polonia,  
Lituanie, Moschouie, & cōmunicata ciuitate, moles  
Imperij excitabatur, & condebatur? cuius arma non  
modò Turcorū armis opponi potuissent, sed etiam  
omnes Christiani nominis nationes, in spem debi-  
litandæ ac frangendæ, immēsa Othomanorum po-  
tentia, ac recuperandi bellici decoris, amissarū-  
que prouinciārum erexissent. Quæ amplificandi ærarij  
occasiones, etsi aliunde nobis oblata non fuissent,  
tamen Polonia, Lituaniaque solum eos fert fru-  
ctus, eas sine iniuria priuatorum, instituendorum  
magnorum vectigalium opportunitates resp. nostra  
habet, vt non tam aliena pecunia, quàm solerti ac  
prudenti administratione & dispensatione egeat.  
Cum Gallis nullæ nobis contentiones, quemad-  
modum & causæ contendendi, tanto terrarum in-  
teruallo disiunctis, fuerunt. Nulla etiam odia. Fuit  
semper mutua beneuolentia, naturæ & morum qua-  
dam similitudine conciliata. At si quæ spes in Gal-  
lis, nobis naturæ propensione fauentibus, collocan-  
da fuit, collocanda quoque fuit in coniunctissimis  
amicis. Tribuenda fides fidelissimæ Bohemorum  
amicitiæ, publicis pactionibus sancitæ, dandum ali-  
quid originis, ac cōmunis lingue vinculo, dandum  
Lechi & Cechi fratrum, conditorum & principum,  
huius Bohemici, illius Polonici, Imperiorum, me-  
morix. Quid verò de Pannoniis dicam, qui suas for-



# IO. ZAMOSCI RENVNCIATIO

tunas cum periculis nostris sæpè communicarint, cum quorū item periculis nos nostras fortunas sæpè communicauimus, nos pro illis, illi pro nobis, fecopiis hostium, ac capitis dimicationi, sæpè obiecerint, eaque caritate, altera gens, alteram prosecuta sit, vt in quodā fœdere, ne Pannonij in Polonos, Poloni in Pannonios arma vnquā, etiam regibus auctoribus, ferrent, disertè caueretur: vt omittam Pannonios & Bohemos, iure quodam à nobis eundem honorem, quo nos quondam affecerunt, reposcere visos, vt quemadmodum illi antè ex Polonia Lituaniāque reges quæsiuissent, ita nos fratrem, filium, ac nepotem regum illorum, regem assumeremus. Nihil agam de antiqua Sueciæ, ac Poloniæ Lituaniæque societate, noua, non ita pridem, affinitate regis ipsorum cum rege nostro, nouis ac maximis officiis confirmata. Bellum nobis fuit pro Prussia cum Marianis militibus, cum Henrico quoque quinto Imperatore, Vratislaviensibus in campis dimicauimus: verū hęc bella nec ab insito gentium, à natura, dissidio, quod nullum est, profecta, nec publico Germaniæ imperij decreto suscepta, sed priuatis consiliis, priuatas ob controuersias concitata fuerunt. Ceteroqui nobis vera & perpetua cum Germanis amicitia mansit. Nam quid ego ab Imperatoribus nobiscum icta, & sæpius renouata, sacrosancta fœdera cōmemorem? Quid pactiones amoris & officij plenissimas cum Austria, Bauarica, Brandeburgensi, Stetinensi, Mechelburgensi, primariis

Ger-



Germaniæ familiis? quid affinitates ab Austria, Ba-  
uarica, Saxonica, Brandeburgensi, Hessica, Stetinen-  
si domo, cum Regibus nostris contractas? quid  
beneficia cum Brandeburgensi, ac Stetinenſi com-  
municata? Quamobrem, HENRICE Princeps,  
etsi id quicquid nobis ex te vtilitatis, præsidij, orna-  
menti, accedere potest, non contemnimus, & ea quæ  
in aliis cernebamur, tibi adiuncta esse lætamur: tamen  
non hæc, quæ extra te posita, nec tam tua quàm for-  
tunæ putanda sunt, nos ad salutem Reipub. nòsque  
& fortunas nostras, imperio & fidei tuæ commen-  
dandas, mouerunt. Valido per se Reipub. nostræ  
corpori capite opus fuit: viro, inquam, viro nobis  
opus fuit. Non te præterit, Princeps sereniss. ma-  
gnæ ac excellentis virtutis splendorem, ex remotissi-  
mis etiam regionibus cerni, & melius cerni. Nam  
quemadmodum solis lumen si de propinquo spe-  
ctetur, nostri oculi, propter imbecillitatem ferre  
non possunt, ita sui excellentem eius virtutem, quem  
assiduè intuentur, quo cum versantur, inuidia cor-  
rupti vix agnoscunt: & quemadmodum sol ex lon-  
ginquo aspectu pulcher, vt est, & amabilis iudicatur:  
ita virtus ab alienis, quos nec odium, nec vlla animi  
perturbatio impedit, melius & verius æstimatur &  
amatur. Quò fit vt præstantis virtutis, postquam  
suorum inuidiam superarit, fama, faciliè disiunctissi-  
mas etiam terras pervagetur, ac quò longius pro-  
gressa fuerit, magis vigeat: vt contrà falsa laus à fami-  
liarium assentatione excitata, sicut fumus, qui pau-



# IO. ZAMOSCII RENUNCIATIO

lummodò supra ignē, à quo oritur, attollere se con-  
suevit, eodem loco in quo excitata est, evanescit.  
Quomodo igitur nos tua incredibilis diuināq; vir-  
tus, in tam sublimi præsertim & illustri loco posita, la-  
tēre potuit? In ea nos semper sentētia fuimus omnes  
Christiani nominis nationes, omnes populos, quasi  
vna quadam ciuitate contineri. Itaque cū extre-  
mi Christianorum simus, & in perpetua quasi sta-  
tione & vigilia pro Repub. Christiana excubemus,  
num censes homines nostros iam inde ab initio de  
ea, non ad præsens modò, sed in futurum cogitasse?  
num ab eo tempore quo inclinare cœpit, tum socio-  
rum cladibus, tum suis periculis permotos, qui reges,  
quo animo, quo consilio, vbiuis Christianis popu-  
lis imperarent, qui regum libeři, qua indole, quo im-  
petu animi ad gloriā essent, quisnam illorum potis-  
simum, vel ad præsens, vel in posterum, perculsam &  
magna ex parte prostratam rem Christianorum, re-  
create & erigere posse videretur, diligenter perquisi-  
uisse? Id cū vt patres ac maiores nostri, ita nos  
dies noctēsque cogitaremus, & diligenter perquire-  
remus, iam ab aliquot annis, te inter alios reperie-  
bamus, quem natura ad magnitudinem animi, pru-  
dentiam, omnesque virtutes magnum hominem &  
excelsū ediderit. Amisimus regem vltimum I A-  
GELLONIAE stirpis, fortuna imperij nostri, ac Rei  
pub. Christianæ, caritas erga patriam, nos in con-  
cordia continuit, concordēs aduersus externā vim,  
si quæ afferretur, armauit, pace foris parta, domi pu-  
blica



blica execratione, capitis & bonorum cōsecratione, obtestatione fidei & famæ, more maiorum, ambitui, largitioni, auaritiæ, dissidiis, frēno imposito, spatium nobis datum est, grauissimæ deliberationis de sufficiendo rege explicandæ. Habuimus, vt dixi, generis ac sanguinis nostri præstantes & excellentes viros, qui regno gerendo & administrando, propter prudentiam, sapientiam, grauitatem, iustitiam, fortitudinem, sufficere poterant. Cauendum tamen nobis, atque omni cura prouidendum fuit, ne præfenti tantum statui ac tempori rectè consuluisse, in posterum verò reip. nostræ parùm prospexisse videremur. Itaque exemplum periculosum, quod ciuilem moderationem animorum tollere, cupiditatem dominandi inducere, ad contentiones & ciuilia bella concitare & inflammare posteritatem nostram aliquando posset, proponere: & semina discordiæ, quam non modò antiquitus maxima imperia, quæ nulla vis externa frangere poterat, confecisse legimus, verumetiam hac ætate florentissima regna, vel attriuisse, vel deleuisse, magno cum nostro dolore videmus, iacere noluius. Moscho creando libertatem nostram periclitandam, propter insitam illi à natura ferociam, non putauimus. IOANNI verò Sueciæ regi tot laboribus, ac aduersis casibus fatigato, difficilem administrationem duorum operosorū in primis regnorum, quorum vtriusque periculorum & negotiorum magnitudo, ne minimo quidem temporis spatio, regis ab-



# IO. ZAMOSCII RENVNCIATIO

sentiam pateretur, fore cernebamus. ERNESTVM AVSTRIVM diuinum adolescentem, præclare indolis, summæque spei iudicauimus, vt eum deinceps magno auxilio & decori rebus Christianis fore, & credamus, & vtilitatis ac dignitatis communis Christianorum causa, optemus, verum eius ætatem ab ætate regali remotam vidimus. Etsi verò non longè remotam, tamen reputantibus humanos casus, & varios ac incertos euentus, obiectis plurimis hostibus, superstitione impiis, crudelitate barbaris, multitudine & firmitate copiarum potentissimis, vel breue tempus nimium longum, grauèque ac periculosum videri debuit. Te, HENRICE Princeps, solum, omnibus rebus, quæ summum atq; perfectum Regem efficerent, atque in primis probata & nobilitata virtute ornatum, te huic prouinciæ, ac tempori, diuino consilio destinatum agnoscebamus. Fundamentum omnium regnorum religio est. Idcirco enim summus Pater atque effector naturæ, regna condidit, & quanquam suæ potestatis non parum regibus impertit, ipse tamen nutu atque potestate sua, Reges & regna regit & tuetur, vt in iis purus illius ac verus cultus vigeat & conseruetur. Itaque primum Rege nobis opus fuit, qui studio & exemplo suo pietatem hominibus commendaret, præpotenti Deo assidue cultum, honorem, preces adhiberet, eius voluntati obediret, eum inspectorem omnium, non modò factorum, sed cogitationum suarum metueret, largitorem omnium commodorum veneraretur. Te in  
omni



omni officio pietatis tuendo, diligentissimum & castissimum sciebamur: te cum fratre tuo rege Christianissimo, plurimum sollicitudinis, plurimum curę posuisse, & suscepisse, maximos & grauissimos labores subiisse & exantlasse, vt controuersia de Deo eiusque cultu, atque aterna illa foelicitate, postquam hoc mortali corpore exuti fuerimus, consequenda, doctorum hominũ disputationibus excitata componi, & vetusta religio, Christi Dei nuncio sancita, non tam vi & armis, quàm auctoritatis scriptorum diuinorum, & præceptorum, ac doctrinæ à sanctis Apostolis tradita, & accepta, pondere fulciri & stabiliri posset: perficique potuisse à vobis, pace, otio, ac sine effusione sanguinis opus maximum, & omnibus sæculis memorandum, nisi aut insolentia, & ambitio quorundam, aut occulta fatorum necessitas, offenso & irato numine, partes ad arma ciuilia, & intestina bella impulisset. Eum cui maximum imperium, multorum hominum salus, ac summa rerum committatur, cautum esse in omni actione suscipienda, multa antè animo prospicere oportet. Prudente igitur rege opus habuimus. Te quantum in discernendis commodis & incommodis intelligentia, futuris prouidendis consilio, ac in omni re expedienda, agēdaque, industria valeres, grauissimis temporibus, ac formidolosissimis tempestatibus, quæ familiam tuam, vniuersamque Galliam, ab ineunte tua, fratrumque tuorum, ætate, exercuerunt, declarasse compertum nobis fuit. Quòd, in iis depellen-



# IO. ZAMOSCII RENVNCIATIO

dis & superandis, frater tuus Rex Christianissimus, te omnium rerum, ac consiliorum, particeps, adiutore, & administro vsus sit. Regibus creandis, ab omnibus populis, æquabile ius quæsitum semper fuit, vt non modò Rex ipse iniuriam non inferret, verumetiam iniurias potentiorum, à tenuioribus arceret. Rege igitur iusto opus habuimus. Te æquitatis semper studiosissimū fuisse, nihil vnquam auarè, nihil libidinosè fecisse noueramus. Nec modò suorum, à suis iniurias prohibere Regem necesse est, sed multo magis externam vim propulsare, ac potissimū regnantem apud eos, quorum legibus rex summam imperij militaris teneat. Rege igitur magno animo, & scientia, ac vsu rei militaris præstante, opus habuimus. Latere nos non potuit, id quod vix vllam in orbe terrarum gentem lateat, te intestino Galliarum bello, maximo & grauissimo, extrema pueritia, fraternarum copiarum ducem, ea ætate, qua aliis vix castravideri accidit, cum hostibus signis collatis dimicasse, eos acie superasse, ac in administrando imperio militari, ad hoc vsque tempus, nullis periculis, nullis laboribus frangi potuisse, nunquam te à rebus constituendis, maturandis, agendis, non modo amœnitatem, aut voluptatem, sed ne quietem quidem, ac famem, sitimque, auocasse, nihil accidisse quod non ipse obires, occurreres, vigilares, tuaque maximè opera, antiquissimum Galliarum regnum, vitam, fortunàsque ciuium conseruatas. Liberis in populis Reges vtilitatis ciuium causa cōstituuntur,

qua-



quapropter Rex commodis & ornamentis ciuium, tum publicè, tum priuatim consulere, nihil in quenquam insolentius, iracundius, acerbius committere debet. Rege igitur Reipub. amante, benefico, ac clemente opus habuimus. Te singulari erga patriam caritate, summa liberalitate in tuos, mitissimòque ac lenissimo ingenio præditum audiuius, qui diuitias tuas, non tam tuas, quàm Reipub. ac illorum, quos periculorum ac laborum tuorum participes vlla ex parte habuisti, duxeris, qui te comem ac facilem omnibus semper præbueris, iram perturbatricem rationis cohibueris, qui ciues aduersus regem arma ferentes non punire, sed illi, patriæque reconciliare studueris, qui nullum ex ciuibus, nisi qui armatus in acie stetisset, pro hoste habueris, cuius opera nullus ciuium, nisi in prælio, occiderit. Quid verò agam de tua grauitate, fide, cōstantia, continentia, & reliquis virtutibus, quas omnes penitus cōprehenderis? Has igitur ob tuas virtutes, HENRICE Princeps, non potentiū hominum studio, aut excellentibus paucorum gratiis, quæ in tanta multitudine, libertate, & integritate eorum, qui suffragia ferrent, satis ad eam rem momenti nunquam attulissent, sed omnium populorum, ac regionum, in quas regnum nostrum descriptum est, omniūque hominū, vna propè voce, te Regem dictum scito. Nihil nos longinquitas itineris, nec difficultates, quæ proponebātur, nec rumores, ad inuidiā tibi cōflandam, à quibusdam sparsi, mouebant. Nullum nobis tui



IO. ZAMOSCII RENVNCIATIO

causa laborem grauem, nihil tibi tanto homini inuium putauimus, inuidiam autem virtute partam, gloriam non inuidiã iudicauimus. Neque de te plura dicam. etenim me tua præsentia, vt finem faciã, cogit.

Explicauì rationes, propter quas ordines Polonię ac Lituanię, summum Imperium ad te mittendum existimarint. Deinceps quale hoc sit Regnum, quod ad te delatum est, explicabo. Neque ego nunc, quàm longè latèque pateat Polonia ac Lituania narrabo, nec regiones, populos in communionem iuris ac Reipub. ascitos, nec regna quondam nobilia, primum in prouinciarum formam redacta, deinde ciuitate donata, enumerabo. Non referam rationes vectigalium, nihil agam de varietate fructuum, nihil de mira vbertate soli, ac copia rei frumentarię, nihil de magnitudine pastionis, nihil de agris publicis, nihil de vrbanoꝝ, oppidanoꝝ, & agrestium ærarioꝝ tributis. Non dicam de portoriis, non de multitudine mercium, & magna ex parte earum, quę non tam ad luxum, quàm ad necessarium vitę vsum pertineant, & earum, quibus vitam ducimus & sustentamur, quibúque vicinę prouincię carere non possunt. Non metiar longitudinem littoris maris Balthici, quod possidemus à finibus Pomeranię Stetinenfis, ad fines vsque Suecię, & Moschouię: non æstimabo fluminum, non instituendorum nouorum portuum, ac emporioꝝ oportunitates, non antiquoꝝ commoditates. Non censebo ferri, plumbi, stanni, salis, quale vix vsquam alibi excin-

ditur,



ditur, ac argenti, metalla. Quæ omnia & fructuosa sunt, & adhibito studio ac ingenio, fructuosiora esse possunt. Etenim à nobis, inter maxima orbis terrarum Imperia, ac inter bellicosissimas nationes, positis, adhuc ita hæc constitui non potuere, ut tanquam ager summa iam cura excultus, solertiam attenti, & naui patris familias non admittant. Verùm de his, inquam, non agam. Neque enim ij sumus, qui ægrè feramus, regis nostri vectigalia, in tanta rerum omnium copia, non respondere numero pecuniæ quorundam regum vectigalibus, qui numerandis pecuniis sibi opulentissimi ac beatissimi videntur, utendis verò se minus beatos ac opulentos experiuntur: neque hanc commendationem regni nostri, apud te hominem ad laudem natum, tantum valere arbitramur, quantum illam, quod nullum regnum tantæ tuæ virtuti convenientius, nulla provincia, ad tantum lumen animi ingeniique ostendendum, aptior & optabilior tibi obuenire potuit. Scio ego Reges, qui diuinæ potentia in terris sint administri, ad sustinendum tanti muneris onus, omnibus summarum rerum gerendarum adiumentis abundè instructos esse, omnesque virtutes penitus animo complecti, ac iis alios anteire debere. Sed tamen quæ in iis maximè commendentur, & quæ præ cæteris emineant, post pietatem erga Deum, à quo omne quodcunque rectū & laudabile est proficiscitur: hæ sunt, magnitudo animi, benignitas naturæ, munificentia, & earum, ac omnium actionum



# IO. ZAMOSCII RENVNCIATIO

moderatrix sapientia. Etenim, quoniam cum Regibus à Deo potestas quodammodo cōmunicata est, quemadmodum diuinæ naturæ maiestas, ac potestas, in eo à mortalibus maximè sentitur, & cernitur, quod mente ac ratione omnia gubernans & dispensans sapientissimè, vitæ hominum imprimis consulat ac provideat, & in omni rerum humanarum, ac totius mundi procuratione, summam potentiam ac vim numinis sui declaret, ita in Regibus quoq; animum magna molientem, & audentem, ac pericula despicientem, pleno ore prædicamus, studium benemerendi de hominibus, bonitatēque amamus, altitudinem mentis & consilij suspicimus. Hæc cū ita se habeant, dico nullum regnum ad virtutes has planè regales declarandas, & exercendas accōmodatius te obtinere potuisse. Ac primū, quod ad magni, ac elati animi vigorem, & studiū bellici decoris spectat, non deerit tibi apud nos iustorum ac piorum bellorum gerendorum materia, & facultas. Præfuiisti superioribus bellis in Gallia militari imperio, insignes victorias retulisti. Verū hæc bella, etsi necessaria, tamen quoniam cum iis, qui communione ortus ac sanguinis, ac omnis humani iuris, & diuini, aliquando, coniuncti erant, pugnabatur, vtrique parti funesta & luctuosa exitēre. Habemus nos Christiani nominis populorum, finitimam & continentem primū imperij Germaniæ, deinde regni Bohemiæ partem. Attingimus etiam Sueciæ fines, extrema Liuania, qua ad ostia Naruæ fluminis  
vergit,



vergit, cetera mari ab ea seiuncti. Præter eas verò adiunctę nobis sunt Pannonia vltior, ac Transsylvania, sociorum fidelissimorum, quondam florentissimum regnum, nunc Turcorum armis infestum, ac magna ex parte subactum. Deinceps sequuntur Moldaui, Othomanorum obnoxij, ac stipendiarij. Inde Bialogrodensis ora, imperij quondam Moldaui-ci pars, nunc Turcorum præfectura. Tum verò Tartarorum, ac Moschorum, vastæ & immensę ditiones. Itaque suppetent tibi, præter veteres nostros socios, quibus-cum perpetuam amicitiam, & cupimus, & pollicemur nobis, hostes perfidia, superstitione, impietate, ab omni humanitatis, non modò religionis, communione iam olim interdicti, quibus-cum, piis omnibus hominibus, ac cælestibus quoque, fauentibus, manus conseras, pœnas ab illis pro tot cladibus Reipub. Christianæ allatis reposcas, multa millia Christianorum, vrbes, populos, prouincias, regna, ex illorum seruitute in libertatē asseras. Suppetent item bellorum causæ, cū ij sint, qui bellorum causas quærere, fidem ac iusiurandum, prout res tempus-que postulauerit, & seruare, & negligere consueverint. Quid autem ego de viribus Poloniæ ac Lituaniæ dicam? O præclaram atque diuinam maiorum nostrorum sapientiam, qui regum nostrorum diuitias, viris potissimum armisque, ac militarium hominum priuatis facultatibus contineri voluerunt! & cū studium rei bellicæ, tum omnibus imperiis, tum nostro, cui iam inde ab initio communes Chri-



# IO. ZAMOSCII RENVNCIATIO

*Nobiles.*

stianorum hostes assiduè imminerent, salutare & gloriosum putarèt, præcipuum in repub. hominum genus, Patriciorum nimirum, ad militandum legibus obstrinxerint, interque patricos neminem iure cooptari, nisi eum, qui bellicum aliquod insigne facinus edidisset, iudicarint. Itaque in Polonia & Lituania, patricij omnes, ut sunt, ita milites appellatur. Hoc legibus ac institutis nostris est, Senatus, publicorum sacerdotum, magistratum, iudicum, seminarium: hi Reges, cum senatu, & aliquot ciuitatù legatis viritim creât, ab his legati leges rogantur, hi honoribus sunt semper ornati, horum oppida, agri, possessiones, iam inde longo interuallo, nulla ratione ærarij habita, immunes factæ, ac præterea à singulis regibus certatim auctæ sunt. Quibus institutis maiorum nostrorù factum est, ut hostes nostros pecuniosos imprimis, innumerabiles copias, lectissimorum militum, multo auro conductorum, aduersus nos ducentes, sæpè, primo impetu illorum eluso & declinato, postquam illos pecunia deficiebat, sine sanguine propè & sudore vinceremus. Etenim Poloniæ Rex, cum bellum illatù propulsandù, finésque defendendi sunt, nulla impensa facta, supra C. M. hominù armare, quòd si belli gloriã ultro sibi querendã proposuerit, omnibus patriciis, spem nominis illustrandi, & ad posteri temporis memoriam propagandi, benèque de Rege, ac Repu. merendi, maioris quàm stipendia æstimantibus, haud valde magno pecuniæ numero in stipendia collato, magnum exercitum conscri-



conscribere potest. At quorum militum? Primum suorum, non alienorū: deinde ex eo genere suorum, quod est, flos Reip. ornāmētum dignitatis. Qui non modò, cū vis illata repellenda, verumetiam pro laude Imperij certandum est, sciunt sibi pro focis, pro coniugibus, pro liberis, pro maiorum imaginibus, próque ornamentis omnibus, quæ nisi existimatione conseruata retinere non possunt, dimicandum. Etenim infamia notati, qui vel in prælio timidè, vel domi turpiter egerint, commodis ac ornāmētis Reipub. & ipso solo patrio, omnique commercio ac societate, etiā à propinquis, ac ipsis coniugibus, & liberis, indigni, more maiorū censentur: reis deniq; rerum capitalium, pro custodia, pro carcere, pro vinctis, metus dedecoris est, mórque ipsa leuior ignominia, ac turpitudine, existimatur. Vnde, cum magno stupore hostium, inclinatas nostrorum acies, ad solam mentionem decoris & honesti, sæpè constitisse, ac non modò multo maiores copias, verū etiam ipsam locorū, ac propè fortunæ, quæ sibi maximam partem in præliis vindicare solet, iniquitatem, superasse constat. Docuere patres maiorésque nostri, tum alibi, tum ad Gruncualdum pagum, Germanorum Cataphractos, ac legiones firmissimas ac stabilissimas vinci posse: docuerunt equitatus Turcici nauitatem, ac Ianizerorum obstinationem animorum haud inuictam esse, & antè, ad Macedoniæ fauces, aliisq; in locis, & posteriùs SIGISMVND0 primo regnāte ad Rohatinū oppidum.



# IO. ZAMOSCII RENVNCIATIO

Docuere multis in praeliis se Pannoniis, ac Bohemis virtute non impares esse. Moschi verò, & Tartari, licet gentes ad bella natæ, quæ otio ac quiete frui nesciant, semper laudis nostræ seges ac materia fuere. Proximū Regem habuimus ingenio in primis acuto & solerti, & caritate ac meritis erga patriam insignem, pacis tamen, quàm belli, artibus magis deditum. Itaque quòd occasiones virtutis declarandæ, vel non dabantur, vel propter insitam animo Regis cunctationem amittebantur, videmur splendori, & magnitudini earum rerum, quas maiores nostri gesserunt, non respondisse. Vigebat tamen, vigetque stirpi illorum innatum decoris ac laudis studium, animorūque robur. Nam, & quando potestas pugnandi à Rege permittebatur, nostri, licet impares numero, nunquam nisi re bene gesta ex pugnare uertēre, & plerique, otij domestici pertæsi, foris sibi materiam bellandi, ac laudis parandæ, quæsiuēre. Quid enim in Neuelensi illo cum Moschis prælio, omnibus sæculis memorando, quid post in pugna, cum iisdem ad Vlam flumen, ac item in conflictu cum copiis Errici, tum Suecorum regis, ad rus Morimum, qui Polonorum & Lituanorum militum animi fuere? quis ardor? quis vulnere, mortisque contemptus? Quæ in expugnanda primū Tauro in Liuania, deinde Isborco in Moschouia, post Vla in finibus Lituaniæ, à Ioanne Moschorum Duce, excitata arce, alacritas? quæ mentes? qui sensus? Quæ cupiditate? quo impetu, sæpè sumptis sponte armis,



mis, Tartaros fines nostros inuadentes, aut repulerunt, aut vlti sunt? Quid, anno superiore, pauci nostri, cùm Bogdanum, ad Moldauia, quæ ab illo, in Russiam profecto, desciiuit, Regnum reducerent, quantam molem exercitus Turcorum, & Moldauorum sustinueret? quantam stragem in hostium exercitu feceret? Infinitum esset singula nostrorum militum superioribus temporibus fortia facta recensere, ex quibus appareat in Polonis Lituaniisque non esse extinctam maiorum virtutem. Quare huiusmodi milites, HENRICE Princeps, tantas copias, hancque materiam bellorum nactus es. Prætereà verò bellicorum equorum multitudinem, conmeatus facilitatem, materiae naualis infinitam vim, omniumque commodorum ad bella instruenda & gerenda, atque ad extruendas & ornandas classes summas facultates, habebis. Exercendæ autem humanitatis & altitudinis animi, quæ dicitur, vbi ratio tutior est, quàm apud illos, qui rectè facere, etsi malo coacti non sint, sciant, ac impetu naturæ ad honestatem ferantur? Qui etsi liberi sint, & seruitutem ferre nequeant, nomen tamen regale magnum & sanctum existiment. Qui ipsi domi omnis mansuetudinis & facilitatis, foris hospitalitatis commendatione floreat, in quibus nihil simulatum, nihil fictum reperiatur. Qui diuitias, potentiam, honores, legum ac disciplinæ veteris tuendæ, Reip. conseruandæ & augendæ, Regumque demerendorum, non arrogantia, insolentia, pertinacia, in-



IO. ZAMOSCII RENVNCIATIO

strumenta esse norint. Qui fidem Regibus datam semper sanctè ac religiosè conseruarint, caritatem non modò erga Reges ipsos, sed erga regiã quoque sobolem, illius commodis & ornamentis diligenter consulendo, demonstrarint. Mansuetudinis quidem, & moderationis animorum in hominibus nostris, vel hoc euidens argumentum est, quòd, cùm à morte Regis silerent leges, magistratuum potestas esset cōstricta, obmutuissent fora; non modò nullus motus, quod vix, in huius sæculi ambitione, & auaritia, fieri posse videbatur, in Rep. exitit, verum etiã inimicitia, ob priuatas controuersias antè susceptæ; Reipub. donatæ sunt, iusticiũ non modò sublatum, verum etiam in eos qui iniurias inferrent, grauiores pœnæ & supplicia maiora constituta sunt; domi pax firmata, omnibus malis artibus conciliandi, quærendique Regni via præclusa est. Atque illud prætereà non minus euidens, quòd, in tanta ciuium dignitate ac præstantia, nemo repertus sit, qui summe rerum præesse, quàm cum omnibus eodem iure viuere mallet. His autem ex rebus & illud facillè perspicias, nullam gentem, nullos homines inueniri, apud quos rectius beneficia Reges collocent, qui & viuos omni officio ac pietate, & mortuorum memoriam gratissimis animis prosequantur. Quibus verò Regibus, tantæ talèsque, vt nostris, ad beneficentiam liberalitatẽque suppetunt copiæ, quæ licet Reges in dies multa suis tribuant, nunquam tamen exhauriri queant. Mihi quidem inter alia præclara, & diuinitus



diuinitus comparata; Reipub. nostræ instituta, hoc  
 eam, noménque nostrum auxisse videtur, quòd in-  
 de à principio à maioribus nostris ita fundata, &  
 cōstituta est, vt ab iis non tam suæ posteritati, quàm  
 posteritatis virtuti, opes & ornamenta pararentur.  
 Propterea cū omnia Regni vectigalia ita diuisis-  
 sent, vt alia priuati, alia publici iuris essent, publico-  
 rum partem Regi ac Reipub. despōderunt: multo  
 maiorem verò excitandæ ac ornandæ ciuium indu-  
 striæ reliquerunt, eaque honoribus ac magistratibus  
 adiunxerunt, qui vt Regia ipsa dignitas, non est ali-  
 cui familiæ addicta, ita non paucarum, sed quarum-  
 uis patriciarum familiarum hominibus paterent,  
 quorum ingenij ac virtutis vis, & merita in Rempu.  
 elucerent. Longum esset omnia commoda & orna-  
 menta hæc enumerare, omnes Pontificatus, omniá-  
 que sacerdotia, omnes regionum, ac forum Princi-  
 patus, quos Palatinatus, & Castellanus vocant,  
 omnes magistratus Regni, ac Regiæ, omnes Præfe-  
 cturas, ac omnes honores singularum regionum, ac  
 forum peculiare, omniáque munera. Ita cū in  
 dies multi ex tenui fortuna, sola virtute nixi, ad am-  
 plissimum quenque ciuitatis gradum perueniant,  
 summásque opes consequantur, fit vt, tot tantisque  
 præmiis propositis, non desit copia prudentissimo-  
 rum & patriæ amantissimorum ciuium, qui non du-  
 bitent se, & salutem suam, pro statu Reipub. & di-  
 gnitate, ac amplitudine Imperij, in discrimen offer-  
 re, & quoniam virtutis & meritorum erga patriam

Episcopa-  
tus.  
Palatina-  
tus.  
Castellá-  
natus.  
Officia  
Regni.  
Officia  
Curie.  
Capita-  
neatus.  
Officia  
& digni-  
tates sin-  
gularum  
Palatina-  
tum, &  
singulari  
terrarum.



IO. ZAMOSCII RENVNCIATIO

æstimator, & cēsor, ac horum, quę dixi, præmiorum dispensator, legibus ac institutis nostris, Rex est, cū ea innumera sint, quod tribuat quotidie alicui, nunquam deest. Iam verò dignam & conuenientem ingenio tuo excellenti, ac prudentia singulari, materiam, quam tractes, & in qua versere, nactus es. Quę quanta sit in tam longè latèque patenti Regno, ea varietate ciuium, ac tot nationibus, quę, vt à communione Reipub. recedas, vix quidquam simile inter se habeant, diuersis linguis vtantur, diuersis legibus ac moribus regantur, constante, atque tot gentibus, & magna ex parte ferocissimis, continente, & proximo, facilè intelligis. Fateor sanè sic à maioribus nostris compositam & informatam esse Rempub. nostram, vt multa Regibus, ad superandam summi muneris, negotiorum molem, adiumenta constituerent. Etenim, cū duo hominum genera in Polonia essent, vnum plebeiū, alterum patriciorum: cūque plebeios arationi, pastioni, omnique rustico operi, artificijs quibuscumque, ac mercaturę operam dare voluissent, & vt iis rebus vacarent, onere militiæ leuassent, leges etiam de priuato iure, quibus Germaniæ populi, quibuscum maxima commercia habent, vterentur, vrbani & oppidani permisissent, patricos verò, vt suprà dixi, ad militiam, & Reip. procuracionem destinassent, quod necesse fuit, ob tantam patriciorum multitudinem, ac remotissima & seiunctissima, maxima ex parte, eorum domicilia, pristinum primū regnum, deinde

plebei.  
Rustici.  
Artifices.  
Mercato-  
res.

oppida-  
ni.

Nobiles.



deinde omnia quaecunque vel in ciuitatem ascita,  
 vel bello deuicta accessere, in regiones, ac ipsas re-  
 giones in fora distinxerunt, ex quibus belli pacisque  
 munia obirentur. Itaque & per regiones militatur,  
 & qualibet in regione aliquot in foris ius redditur,  
 ac quauis regio, sua concilia, suosque magistratus,  
 ac imaginem quandam quasi Reip. habet. In his  
 conciliis Rex, si quid de Rep. noui, vel de bello sta-  
 tuendum est, absens per literas, & nuntios promul-  
 gat: inde legati cum mandatis, in cōmuni totius Po-  
 loniæ & Lituaniæ cōcilio, leges, quæ à Regibus ferā-  
 tur, aut iubent, aut antiquant. Ac prætereā Regi ad-  
 iunctum est Senatus consilium sempiternū, quod ex  
 magistratibus præcipuis, regionum, & forum princi-  
 pibus, pontificibusque, hoc est primariis viris, inter  
 quos omnes Imperij partes ac regiones sapientia &  
 auctoritate regēde, potissimāque Reip. munera pro-  
 curanda, distributa sunt, constat. Hunc Senatum  
 Rex, si quid ad patricos ferēdum, vel prout tempus  
 & res inciderit, maturandum est, consulit, cum hoc  
 de criminibus publicis decernit, & de controuersis  
 priuatis omnium, à quibus esset appellatus, adhuc  
 decernebat. Itaque Rex noster, cū omnia ad  
 præscriptum legum reuocanda, & quidquid in Rep.  
 suscipiendum & agendum sit, ex auctoritate patrum  
 conscriptorum suscipiat & agat, multis partibus  
 faciliorem, & expeditiorē administrationem regni  
 habet. Verumtamen cū vtrique ordini dux & au-  
 ctor, ac summi consilii moderator esse debeat, ma-

Palatina-  
tus.

Districtus.

Comitia  
particu-  
laria.Comitia  
generalia.officiales  
Regni.Palatini  
& Ca-  
stellani.  
Episcopi.

# IO. ZAMOSCII RENVNCIATIO

gno illum ingenio, magna solertia præditum, ac omnes leges, omnia instituta, scientia comprehensa tenere opus est, singulorum regni populorum ius, conditionē, mores nosse, in fœderibus esse versatū, tenere exempla maiorum. Quæ cognitio cū varia & multiplex sit, tum verò illud non parvæ prudentiæ videtur, perspicere singulorum hominum ingenia, vt discernat qui ad necessarias apparitiones adhibendi, qui in senatum legendi, quibus sacerdotia, honores, imperia, magistratus mandandi sint: in quo primū existimatio Regis, deinde Reip. salus agitur, vt Rex fideles & peritos cōsultores, adiutores negotiorum publicorū, & ministros Imperij sibi asciscat. Cū verò Resp. quoque nostra senserit incommodum dissensionis de religione, quod pleræque Christianæ provinciæ, ad quas hæc opinionum de Deo eiūsque cultu diuersitas permanuit, sensere, magni erit iudicij, magnique consilij providere, ne quid violenter agatur, néve ad discordias & bellum ciuile deueniatur, quod aliis Regnis nuper plurimum detrimenti attulit, nostro, Barbaris in omnem occasionem opprimēdi nostri intētis, exitium statim afferret. Adhæc, multa necdum inchoata in Repub. desiderantur, multa, vt res humanæ sunt caducæ, & inconstantes, dilapsa fluxerunt, quæ ratione & consilio constringenda, constituenda iudicia, plurimæque alia præsidia firmitatis Imperij restituenda, & de nouo comparanda sunt. His in omnibus tum cognoscendis, tum efficiendis, men-

tis tuæ



tis tuæ acumen & industria occupabitur. Quibus quidem verissimis laudibus, satis tibi, & regia in domo nato, & regiis virtutibus ornato Principi, commendatum Regnum nostrum, vel potius iam tuum, arbitror.

QVID autem patria nostra à te expectet, quid de te sibi polliceatur, patere quæso me illius oratione exponere: quam tecum sic agere, & quodammodo loqui tacitam, existimato. Magnum onus Regiæ dignitatis esse sentis, HENRICE, etiam si hæreditate, ac maiorum meritis obuenerit: multo tamen maius & grauius, cùm iudicio eorum, qui parere debeant, delatum est. Itaque, vt gloriosius fuerit, tibi non in cunabulis desponsum, sed in campo, tot virorum liberis animis affectorum, alienorū, ac nulla ex parte obnoxiorū, suffragiis, Regnum datum esse: ita eo plus, te inuigilare ac elaborare oportere cernis, vt efficias ne eos, qui te delegerūt, iudicio lapsos esse appareat. Gessisti res magnas, verum eam prouinciam nunc tibi oblatam vides, vt multo maiora, iis quæ gesseris, & mihi, & Reip. Christianæ à te debeantur. Omnium, orbis terrarum, gentium animos expectatione commouisti. Qui honori tuo fauent, te illum fore augurantur, qui non modò meis ciuibus bellicam existimationem, quæ vitio superiorum temporum iacuit, restituas, & iniurias mihi à barbaris illatas vlciscare, verumetiam adflictam rem Christianorum erigas & excites: Qui inuident tibi, nihil magis cupiunt, quàm vt laudi & glo-

IO. ZAMOSCII RENVNCIATIO

riæ seruire definas. Cara tibi Gallia est, quòd te genuit, quòd educauit: multis quoque nominibus tibi tuæque familiæ Gallia obstricta est, quòd à vobis sæpè adiuta, & defensa in periculis, assiduè verò summo studio exculta, & ornata est. Ego te nullis tuis, tuorúmque meritis, prouocata, ad summum honorem extuli. Itaque cùm, sapientissimorum hominum iudicio, plus tribuendum sit amorì patriæ illius, quæ excepit, quàm eius quæ genuit, confido me tibi fore carissimam, quæ te ultro aduocauerim, & regia dignitate decorauerim. Cùm te habebò, reddita mihi omnia, quæ in superioribus Regibus clucebant, videbuntur. Elatio animi, ac robur, & felicitas **BOLESLAORVM**: constantia in rebus aduersis **VLADISLAI LOCTICONIS**: moderatio in secundis **VLADISLAI IAGELLONIS**: magnificentia, ac iustitia, **CASIMIRI MAGNI**: grauitas & sapiëntia **SIGISMUNDI**: lenitas & mansuetudo **AVGVSTI**. Itaq; modò me beneuolentia complectare, equius illorùm desiderium feram. Eam declarasti naturæ tuæ bonitatē, vt ipsa per se impultrice, etiam si nulla iureiurādi, quod legatis meis à te datum est, religione obstricta foret, ea quæ mihi promissisti, te non tantùm repræsentaturū, sed cumulatiora redditurum, ac deinceps omnem operā, omne studium, ac omnia consilia ad vtilitatem & dignitatem meam relaturum confidam. Hac spe freta tibi Remp. bona, fortunas, iura, libertatēque meorum committo ac commendo: libertatem, inquam, meorum,



rum, quæ illis vita potior & optabilior est, tibi committo & commendo: ac quod eius, non secus ac tuæ, curam habebis, pro re certa statuo. Qua firmissima spe, si, quod omen auertat Deus, decidero, ô me non modò miseram, sed & stultam, quod non tam misericordia, quàm reprehensione multorum, quos tibi posthabui, digna videbor. Si his quæ à te expecto fruar, non modò me beatam, verùm te quoque beatum, qui in summa ciuium caritate, pulcherrimorum factorum conscientia, cùm certissima spe immortalis memoriæ perfruere, & cuius familiæ ac posteritatis dominationem, non modò mei, verum etiam aliorum Imperiorum populi deinceps certatim deposcent. Hæc tecum ipsa patria nostra.

Nos verò omnium regnorum conditorem, conseruatorem, ac præsidem summum, qui Regum omnium mentes nutu suo regit, precamur, vèneramur & imploramus, vt quemadmodum nostrorum hominum corda spiritu suo afflauit, vt te omnes summo consensu Regem dicerent, ita tua omnia consilia atque facta, ad sui nominis laudem, & salutem, ac cōmoda nostra dirigat, & te, ac Regnū nostrum, quod pulcherrimum & florentissimum adhuc esse voluit, tueatur ac defendat. Quamobrem vt iam mandata exequamur, vt te populorum Poloniæ, Lituaniæ, Russiæ, Prussiæ, Masouiæ, Samogitiæ, Kiouiæ, Voliniæ, Podlachiæ, Liuonię, Senatus, Patricij, & ciuitates, quæ suffragij lationem habent, Regem legibus ac institutis maiorum creauere: ita

nos quoque hîc te omnium eorum populorum Regem, quod tibi magistratuique tuo, ac nobis, & Reip. nostræ faustè, feliciter, atque prosperè eueniat, renunciamus, rogationisq; de Imperio tuo iussâ, publicas tabulas tibi reddimus, & tui, more maiorum, inaugurandi diem ante V I. Non. Octobr. in comitiis dictam denunciamus, atque vt in Poloniam quamprimùm proficiscare, te vehemèter oramus. Quæ insistent regno nostro procellæ, quæ tempestates, & si nos taceamus, res ipsa loquitur. Hæ solo aduentu tuo depelli possunt. Omnium animi sunt intenti in aduētum tuum. Iam cogitatione præcipio, eius diei gratulationem ac incredibilem nostrorum letitiâ, qua te ornatum Regiis insignibus in folio regali, tanquam de cælo delapsum, diuinum hominem intuebuntur. Noli igitur deesse, Rex potentissime, amantissimo & cupidissimo tui Regno, noli differre gaudium tuorum, matura iter eò, quò te diuina voluntas, occulta fatorum lege, quò te virtus tua, quò fauor hominum vocat. Opera, studio, fide, ac diligentia, vt Pater Reipub. nostræ dicare, effecturus, & nunciis Christianis populis latissimis orbem terrarum breui impleturus, ac nobilissimos triumphos, de nostris, ac Reipub. Christianæ deuictis hostibus, instructurus.

FINIS.



19  
CORRIGENDA.

*Folio 2. b. Versu primo, benemeritorum, lege bene meritorum.*

*Folio 4. b. Versu 15. lege à Bohemis, non, cum Bohemis.*

*Folio 13. b. Versu 16. lege, ex pugna reuertère.*

